

殘賊蓋賊害之鳥也。京房易傳曰：伯勞聚邑中歲大水。若軍中鳴師分而且水卒至，若見軍前後鳴，賊來圍入，含有仇恐。外謀內口舌若悲鳴來有死者也。次反舌無聲。此鳥春初鳴，至五月稍止，其聲數轉，故名反舌。易緯通卦驗曰：能反覆其口，隨百鳥之音，故爲反舌鳥。又百舌也。周書云：芒種五日之後，反舌無聲。若有聲，佞人在側。孔子明鏡曰：國臣謀臣有反舌鳥入宮。夏至五月中，配于午鹿角。墮，易通卦驗曰：鹿者獸中之陽也。此時候應陰解角也。大陽始屈，陰氣始升，陰陽相向之候也。若不解則失君臣之禮。臣不承君之象也。故貴臣作姦也。此時候陰氣動於黃泉之下，又午盛陽之位，而居南方，故主夏至以配于火。次蟬始鳴。此亦無文。今按仲夏者，麥秋盡成，而陰陽相向之節，應之而蟬始鳴乎。次半夏。此時候無文。蓋半夏是藥草也。小暑六月節，配于丁溫風始。至此亦無文。今按南方名暑，門生景風，盛熱之時也。故溫風至矣。又小暑者極熱之物也。鄭玄云：丁亭也。物生長時應而止也。故丁主小暑，以配于火。次蟋蟀居壁。爾雅釋虫曰：蟋蟀，蜚也。此物生在土中。至季夏羽翼稍成，未能遠飛，但居其壁。至七月則能遠飛在野。次鷹乃習。此時候陰氣既起，應感乃有殺心。學習搏擊之事。張逸曰：秋鳩化爲鷹，春鷹化鳩。又自有真鷹可習矣。大暑六月中，配于未腐草化爲螢。此時腐草得暑濕之氣，爲螢。李巡云：螢夜飛，腹下如火光，故曰卽炤也。又大暑月半極熱之中爲大，又未者味也。物向成皆有氣味，故未主六月中以配于土。次土潤溽暑。溽溽者塗濕也。此時候陽氣將在土，故暑乎。次大雨時行。六月建未，未值井宿，主水，故大雨時行節也。周禮曰：此時立其官使除田草也。五月夏至之時，芟草殺暴之。至六月燒之，大雨行之時，田中蓄潰之瘠地爲肥也。立秋七月節，配于坤涼風至。此時候無文。今按之涼風者，秋風也。陰氣淒涼，收成万物。鄭玄云：坤純陰之象，能養万物，莫過於地。陰動于午，至未始著，故坤主立秋。在西南之維，以配于土。次白露降者，陰氣漸重，露濃色白之謂。次寒蟬鳴。寒蟬一名寒蜩，又謂蛻也。郭景純云：寒蟬也，似蟬而小青赤也。處暑七月中，配于申鷹乃祭鳥。此時候鷹祭鳥者，欲食之時，先殺鳥而不食，與人之祭食相似也。先神卽不食，既祭之後，不必盡食。若人君行刑戮而已矣。次天地始肅。肅，肅嚴急之言也。今按天氣漸上，地氣漸下，肅然而物改更。